



office@armeniandiasporasurvey.com
www.armeniandiasporasurvey.com



Մամլոյ Հաղորդակցութիւն
Լոնտոն, 10 Մայիս 2019

Դոկտ. Հրաչ Զիլինկիրեան Սփիւռքի Հետազոտական Ծրագրի Տնօրէն Նշանակուած Է

Գալուստ Կիւլպենկեան Հիմնադրամի Հայկական Համայնքներու Բաժանմունքի նախաձեռնութեամբ՝ Սփիւռքի հետազոտական նոր ծրագրի մը տնօրէն նշանակուած է Օքսֆորտ համալսարանի դասախօս դոկտ. Հրաչ Զիլինկիրեանը:

«Հայ սփիւռքի հարցախոյզ» (Armenian Diaspora Survey) հետազոտական ծրագրին նպատակն է խիստ կարեւոր բաց մը գոցել Սփիւռքի վերաբերող գիտելիքներուն մէջ, որպէսզի կարելի ըլլայ գոյացնել փաստերու վրայ հիմնուած հասկացողութիւնը մը՝ բազմակողմանի եւ բազմաշերտ սփիւռքեան ժամանակակից կեանքին մասին:

«Ուրախ ենք որ դոկտ. Հրաչ Զիլինկիրեանը այս պաշտօնը ստանձնած է: Նախապէս գործակցած ենք իր հետ մեր շարք մը նախաձեռնութիւններու ծիրէն ներս, ինչպէս «Արեւմտահայերէնը 21-րդ դարուն» Օքսֆորտի եւ «Հայերը 2115-ին» Լիզպոնի համաժողովներուն առթիւ», ըսաւ Կիւլպենկեան Հիմնարկի Հայկական բաժնի տնօրէն՝ դոկտ. Ռազմիկ Փանոսեան, աւելցնելով՝ որ իրենց արդիւնաւէտ գործակցութիւնը պիտի շարունակեն Լոնտոնի Հայ հիմնարկին եւ ծրագրի յանձնառու խումբին հետ:

Առաջին հանգրուանով, սփիւռքեան չորս քաղաքներու մէջ (Պոսթըն, Գահիրէ, Մարսէյ եւ Փասատենա), Մայիս եւ Յունիս 2018-ին, աւելի քան 1000 հայեր իրենց մասնակցութիւնը բերին այս աննախընթաց հարցախոյզին, գլխաւորութեամբ՝ գիտնականներու, հետազոտողներու եւ փորձագէտներու: Համապարփակ աւելի մեծ ծրագրի մը մաս կազմող այս փորձառական փուլը նպատակ ունէր պատկերացում մը տալ հայկական ժամանակակից սփիւռքին մասին:

«Մեր ուսումնասիրութեան արդիւնքները, որոնք տեղեկութիւններ կու տան հայ համայնքներուն մէջ առկայ հարցերուն եւ մտածողութեան եղանակներուն

մասին, վստահաբար օգտակար պիտի ըլլան Սփիւոքի մէջ գործող հաստատութիւններու եւ համայնքներու ղեկավարներուն, ինչպէս նաեւ՝ Հայաստանի մէջ քաղաքականութիւն մշակողներուն համար», նշեց դոկտ. Չիլինկիրեան:

Հետազոտութեան արդիւնքները եւ տեղեկութիւնները հասանելի պիտի ըլլան հասարակութեան եւ գիտաշխատողներու: 2018-ի ուսումնասիրութեան ամբողջական արդիւնքները շուտով հատորի մը մէջ պիտի հրատարակուին:

«Այս տարուայ ծրագրի գործադրութեան համար գործի լծուած են միջազգային մասնագիտական խորհրդատու մարմին մը եւ գործադիր խումբ մը, որոնք՝ պատրաստած են ծրագրին մեթոտաբանութիւնը, հետազոտութեան միջոցները, աշխատանքներու նախապատրաստութիւնը, ինչպէս նաեւ՝ հարցախոյզներու տնօրինման եւ հաւաքուած տեղեկութիւններու մշակման եղանակները», բացատրեց դոկտ. Չիլինկիրեան, որ մասնագիտութեամբ ընկերաբան է եւ որուն գիտական ուսումնասիրութիւններու լուսարձակի տակ են շարք մը նիւթեր, ինչպէս ինքնութեան, Սփիւոք–Հայաստան յարաբերութիւններու, կրօնի ու Միջին Արեւելքի հարցերն ու խնդիրները:

«Հայ սփիւոքի հարցախոյզ»ի մասին յաւելեալ տեղեկութիւններ կարելի է գտնել ծրագրի կայքէջին վրայ: www.armeniandiasporasurvey.com